

08/09/1999

Peti undi, hadiah peraduan di MyMalaysia

BERMULA minggu lalu, laman Web MyMalaysia yang boleh dicapai di <http://www.mymalaysia.com.my>, memberi peluang kepada pengunjung untuk mengundi dan mengkaji isu semasa yang diketengahkan.

Dengan cara itu, pengunjung berpeluang menilai dan menganalisis sendiri isu tertentu selain dapat mencurahkan idea untuk dikongsi bersama pengunjung lain. Pandangan dan undi pengunjung akan dipaparkan setiap hari.

Laman itu yang dilancarkan awal Ogos lepas oleh Perdana Menteri Datuk Seri Dr Mahathir Mohamad dibangunkan khas Pertubuhan Bukan Kerajaan (NGO) dan individu dalam usaha memerangi laporan negatif tersiar dalam akhbar tertentu atau Internet.

Dua matlamat utama ialah menyalurkan maklumat tepat kepada rakyat tempatan dan luar negara selain menangkis maklumat yang mengelirukan atau berbentuk fitnah.

Pada masa yang sama laman itu turut menawarkan peraduan interaktif dalam talian yang bertajuk 'Malaysia Funride' untuk memberi peluang pelawat menikmati lawatan secara animasi maya di keseluruhan laman.

Peraduan yang akan berakhir 31 Disember, 1999 itu turut mempromosikan tempat-tempat menarik di Malaysia dan membolehkan pengunjung dalam atau luar negara mendalami fakta menarik mengenai Malaysia.

Peserta peraduan dengan peranan sebagai pelancong yang menaiki beca mendapatkan fakta menarik mengenai negara ini berasaskan lima kategori utama iaitu Politik, Ekonomi, Pelancongan, Hak Asasi Manusia dan Sains, Teknologi dan Alam Sekitar.

Pembayang dan jawapan terdapat di sekitar tempat yang dilawati.

Bagaimanapun, peraduan ini adalah berasaskan masa yang memerlukan peserta menjawab lima soalan dengan betul dan pantas. Peserta terpantas dikira sebagai pemenang.

Hadiah menarik disediakan penganjur untuk tiga pemenang bertuah setiap bulan.

Peraduan peringkat akhir yang bermula awal Disember depan membolehkan peserta yang memberikan 10 jawapan betul menerima hadiah pakej pelancongan tiga hari dua malam ke Pulau Langkawi untuk dua orang.

Hadiah merangkumi tiket penerbangan pergi dan balik serta kemudahan penginapan. Keputusan pertandingan itu dipaparkan di laman ini pada 15 Januari tahun depan.

(END)